



## ***Komunikadu Imprensa***

23 Maiu 2013

### **Tribunál Disitritál Suai kondena arguidu tinan 1 prizaun maibé suspende ba tinan 1 fulan 6 ba kazu violénsia doméstika**

Iha 17 Maiu 2013 Tribunál Disitritál Suai kondena arguidu ne'ebé halo violénsia doméstika kontra nia feen ba tinan 1 iha prizaun maibé suspende ba tinan 1 ho fulan 6. Kazu ne'e akontese iha Suco Lahomea, Sub Distritu Maliana, Distritu Bobonaro.

Ministériu Públiku akuza katak iha 11 Novembru 2012, arguidu basa nia feen iha hasan loos, buti iha kakorok no rasta nia feen to'o monu ba rai. Hahalok ne'e kauza vítima nia nehan ida monu no halo nia sente moras maka'as iha nia kakorok no ibun. Motivu ba akontesimentu ne'e tanba vítima diskute malu maka'as no ko'alia barak ba arguidu tanba osan \$5 ne'ebé arguidu fó ba nia oan.

“JSMP apresia servisu tribunál hodi julga kazu violénsia doméstika. Iha kazu hanesan ne'e, importante atu fasilita indemnizasaun ba vítima ne'ebé sofre kanek grave tanba agresór nia hahalok, nomós atu rehabilita agresór hodi nune'e prevene repetisaun ba violénsia doméstika,” dehan Diretor Ezekutivu JSMP, Luis de Oliveira Sampaio.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35(b) Lei Kontra Violénsia Doméstika.

Arguidu konfesa aktu ne'ebé nia komete hasoru nia feen ho nune'e tribunál imediatamente decide hodi lee sentensa hodi kondena arguidu.

Kazu ne'e rejista iha tribunál ho Númeru Prosesu: 24/Crime.S/2013/TDS. Dr. Constançio Basmary prezide kazu ne'e, Dra. Bemvinda do Rosario representa Ministériu Públiku. Arguidu hetan defeza husi Dr. Marçal Mascarinhas, husi Eskritóriu Defensória Públiku. Sr. Ernesto de Jesus, ofisiál justisa estajiáriu, mak responsavel iha prosesu.

Atu hetan informasaun kle'an liután favór kontaktu:

Luis de Oliveira Sampaio

Diretor Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883 | 77295795

Website: [www.jsmp.tl](http://www.jsmp.tl)

Facebook: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl

